

San Pablobi

EFESO

Bainni utire toyani saobi

Saludo

1 ¹Yë'ë, Pablo hue'eguëbi, Riusubi yë'ëre cuencueni re'huaguëna, baguëre ta'yejeiye yo'o conguë ba'iguë'ë. Jesucristobi yë'ëre choini re'huaguëna, baguë yo'ore yo'oguë ba'iyë. Ja'nca ba'iguëbi, mësacua Cristo bain baguëni si'a recoyo ro'tajën ba'ijënna, mësacua Cristo bainreba Efeso hu'e jobore ba'icua, ja'ancuani utire toyani saoyë yë'ë. ²Mai Taita Riusu, mai Èjaguë Jesucristobi mësacuani ai oijën conjën, mësacuani ai recoyo bojo güeseja'bë cayë yë'ë.

Bendiciones espirituales en Cristo

³Yureca, mai Taita Riusure ro'tato, mai Èjaguë Jesucristo Ja'quë ba'iguëna, baguë ta'yejeiyereba ba'iyete bojoreba bojojën cañuni. Baguëbi maire ëñani, Yë'ë bain Cristoni si'a recoyo ro'tajën ba'icua ta'yejeiyereba re'oye conza caguë, baguë guënamë re'oto bayete caraye beoye maina jo'cabi. ⁴Èn yijare re'huani jo'casirën quë'rë ja'anrë mai ba'ija'yete ro'tani, baguë bainreba ba'ija'yete cuencueni, Jesucristo tëani baja'yete re'huani tonbi. “Yë'ë bainreba ba'ija'cuabi gare recoyo tënoreba tënosi'cua ba'ijën, gu'a jucha gare senjosi'cua ba'ija'bë” caguë, ⁵mai ba'ija'yete ro'tani, maini ai yëreba yëguë bajili. Ja'nca yëguë sëani, Jesucristobi mai gu'a jucha ro'ire junni tonja'ñete ro'tani, mai ba'ija'ye, baguë bainreba ba'ija'yete cuencueni, Yë'ë re'o zin hua'nare bacuare re'huani baza caguë, baguë yo'oguë ba'ija'yete bojoguë ro'tani, cuencueni tonbi Riusu. ⁶Ja'nca cuencueni tonguëna, maibi yureca baguë ta'yejeiyereba ba'iyete jo'caye beoye bojoreba bojojën cañuni. Baguë

guënamë re'oto bayete maini ai ba'iyë ai re'oye jo'caguë ba'iji. Baguë Zin ai yësi'quë naconi te'e zil'inni ba'icuabi baguë bayete ai coreba cojën, ai bojoyë mai cajën, baguë ta'yejeiye ba'iyete jo'caye beoye cajën bañuni. 7 Riusubi maini, gu'a jucha yo'ojën ba'isi'cuani ai oiguë basi'quë sëani, baguë Zin Jesucristobi crusu sa'cahuëna junni tonguëna, baguë zie jañuni tonse'ebi Riusu bainrebare re'huasi'cua ba'iyë mai. Mai gu'a jucha yo'ojën ba'ise'ere gare se'e ro'tama'iguë ba'iji Riusu. 8 Maini ja'nca ai yëreba ai yëguëbi baguë ba'iyete ta'yejeiyereba maini masi güeseji. 9 Baguë ai ba'irën cuencueni re'huase'ere, baguë yurerën tëca yahue masise'ere yurera maini te'e ruiñe masi güeseji. Baguë Zin Jesucristo raoja'yete zoe ro'tani, maini yureña masi güesebi. 10 “Baguë raoja'rën ti'anguëna, si'aye yë'ë re'huaní jo'case'e, yija re'oto, guënamë re'oto re'huaní jo'case'e beoru ñë'coni baguëna jo'caza” caguë yo'obi Riusu.

11 Ja'nca yo'oguëbi maire'ga cuencueguëna, maibi baguë naconi te'e zil'inni baë'ë. Baguë ai ba'irën ba'ise'e'ru yurera maire ja'nca zil'inni ba'iji. Ai ta'yejeiye yo'oye pore Ëjaguë sëani, maire choini baguëna, baguë bayete te'e coní bayë mai. 12 Ja'nca sëani, mai hua'nabi Cristoni si'a recoyo ro'tajën, yequëcua'ru quë'rë ja'anrë ro'tajën ba'icuabi baguë ta'yejeiyereba ba'iyete bojojën cañuni. Baguë ba'iyete ai ba'iyë quëani achoñuni. 13 Mësacua'ga baguë te'e ruiñe ba'i cocarebare achani, Cristo tëani bayete masini, mësacuabi ai bojojën, Cristoni si'a recoyo ro'tajëna, Riusubi baguë coca caní jo'case'e'ru güina'ru yo'oguë, baguë Espíritute mësacuana raoni jo'caní, baguë bainrebare mësacuare re'huaní babil. 14 Ja'nca re'huaní baguëna, mësacuabi baguë Espíritute bajën, baguë guënamë re'oto bayete coja'rën ti'añe tëca bajën, mësacua coní baja'yete te'e ruiñe masiyë. Ja'nca masijën, baguëni bojojën, baguë ta'yejeiyereba pore Ëjaguë ba'iyete ai ba'iyë quëani achojën, si'a bainni masi güesejën bañuni.

Pablo pide a Dios que dé sabiduría a los creyentes

15 Riusubi maina ja'nca insini jo'caguëna, yë'l'ë'ga mësacua si'a recoyo ro'tase'ere achani, ai bojohuë. Mësacuabi mai Ëjaguë Jesusni si'a recoyo ro'tani, si'a baguë bainni ai recoyo oijën conjëna, yë'l'ë'ga ja'anre achani, 16 ai bojo recoyo re'huaní, Riusuni jo'caye beoye mësacuare surupa caguë, mësacua ba'iyete Riusuni si'arën senni achaguë ba'iyë yë'ë. 17 Mai ta'yejeiyereba Ëjaguë Riusu, mai Ëjaguë Jesucristo Ja'quë, ja'anguëni senni achaguë, baguë ta'yejeiye masiyete mësacuani te'e ruiñe masi güesej'ë'n señë. Baguë ba'iyete re'oye ye'yeni, baguëni quë'rë se'e ai re'oye masi güesej'ë'n, señë yë'ë. 18 Ja'nca masi güesequëna, mësacuabi Riusu ba'iyete gare huesësi'cua ba'ijën, mësacua yua baguë ta'yejeiye ba'iyete ai ëama'iñereba masija'cua'ë. Baguë guënamë re'oto bayete

mësacua gare carajeiye beoye coni baja'yete masini, yè'ère choisi'quë sèani, baguë naconi si'arën ba'ija'yete conni bazaniñë cajën, si'a baguë bain naconi ai ta'yejeiye bojojën ñë'caja'yete gare jo'caye beoye ëjojën ba'ija'cua'ë. ¹⁹Baguë ta'yejeiyereba pore Ëjaguë ba'iyere'ga masija'cua'ë mësacua. Mai gare ëñama'ise'e ba'iyeru què'rë ai ta'yejeiye yo'oye poreguëbi baguë bainre, Cristoni si'a recoyo ro'tacuare sèani, maire ai ta'yejeiye ai re'oye conni cuiraji. Ja'nca ai ta'yejeiye yo'oye poreguëna, maibi yuara masiyë, ²⁰Cristo junni tonsi'quëni huajë güesesi'quë sèani. Maina Raosi'quëreba ba'iguëbi junni tonguëna, mai pore Ëjaguë Riusubi baguëni huajëreba huajë güeseni, si'a guënamë re'oto ba'icua'ru què'rë ta'yejeiye Ëjaguëre baguëte re'huani, baguë jëja ca'ncona bëa güesebi. ²¹Ja'nca bëa güeseaguë, si'a guënamë re'oto ëjacua, si'a ën yija re'oto ëjacua, si'a ëjacua ba'ijën ba'isi'cua, si'acua'ru què'rë ai ta'yejeiye Ëjaguëre ba Cristore re'huani baguëni guanse güesebi Riusu. ²²Ja'nca guanse güeseaguëbi ba je'ocua si'acuare ta'yejeiye ënseni, bacua, baguë bayere'ga si'ayete yè'ë bayete jo'cani, Yè'ë bayete si'aye bajë'n më'ë'ga, caji. Yè'ë bainreba jubë si'a jubëte ñë'coni, bacua què'rë ta'yejeiyereba Ëjaguë ba'ijë'n, caji. ²³Ja'nca cani jo'caguëna, mai yua Cristo bain jubëreba ba'ijën, Cristoni te'e zi'inni ba'icua ba'ijën, baguëre yo'o concua re'huasi'cua ba'iyë mai. Ja'nca re'huasi'cua ba'ijënna, baguë bayete cato, gare carajeiye beoye maina si'arënreba ro insireba insini jo'caguë, maina ai re'oyereba ai re'oye cuiraji Cristo.

Salvos por el amor de Dios

2 ¹Yureca, mësacua ja'anrë ba'ijën ba'ise'ere ro'tato, mësacua gu'a jucha yo'ojën ba'ise'e ro'ire gare bënni senjoja'cua se'ga ba'ijën ba'nhuë. Riusuni gare huesëcua ba'ijën, ²ro ën yija bain yo'ojën ba'iyeru gu'aye yo'ojën, zupai huati ëñoñe se'gare'ru yo'ojën ba'ijën ba'nhuë mësacua. Ai gu'a huati sèani, si'a bainni coqueza caguë, Riusu yëye'ru maini tin yo'o güeseji. Riusu guanseni jo'case'le'ru si'a bainni gare tin yo'o güeseji baguë. ³Ja'nca yo'o güeseaguëna, mai si'acua'ga zupai huati yëye'ru yequërëña yo'ojën ba'ijën ba'nhuë. Ro mai gu'a ëase'e se'gare ro'tajën, gu'aye yo'oye se'gare ro'tajën, yo'o bi'rajën ba'nhuë mai. Si'a ën yija bain yo'oye'ru güina'ru yo'ojën, Riusu yëye'ru gare yo'oye güejën, Riusu bënni senjoja'cua se'ga ba'ijën ba'nhuë mai. ⁴Ja'nca ba'isi'cuareta'an, Mai Ëjaguë Riusu, yua si'a bainni oire bani caraye beoye coñe yëguëbi maire ai ta'yejeiye ai yëguë, maini bënni senjoñe ro'tama'iguë baji'i. ⁵Maire bënni senjoja'ñe ba'ise'ere ro'tato, ro gu'aye yo'ojën ba'isi'cua, mai se'gabi mame recoyo re'huaye gare porema'icua ba'ijën ba'nhuë. Ja'nca ba'isi'cua ba'ijënna, Riusubi maire ai ba'iyë ai yëguëbi mame recoyo ba'icuaire maire re'huani, baguë re'o bainre

re'huani, Cristo naconi maire babi. Ja'nca sèani, Riusu se'gabi re'oye yo'oye yèguè, mèsacuare tèani, mèsacuani baji. ⁶Ja'nca tèani baguèbi, baguè ba'i re'otore maire masi güeseni, Cristo Jesús huajè güesesi'què naconi maini te'e bëa güeseji. Baguè naconi carajeiye beoye si'arèn ba'i güeseji maire. ⁷Ja'nca güesejuèbi bacuani ai ba'iye ai oire baguè, baguè ba'i re'oto ba'ija'rèn ba'ijènna, si'a baru ba'icuai maire èñoñe ro'taji. “Èñajè'èn. Ro gu'a jucha yo'ojèn ba'isi'cuabi yè'è yèye'ru yo'oye gare poremajènna, bacuani ai ba'iye ai oire baguè, mame recoyo bacuare re'huani, yè'è ba'i re'otona tèani bahuè. Cristo Jesús naconi yè'è bayete te'e conì bacua ba'iyè bacua” maire caja'guè'bi Riusu. ⁸Ja'nca sèani, Riusu tèani base'ere cato, baguè se'gabi mèsacuani oire bani, mèsacuare tèani babi. Ro mèsacua yo'ojèn ba'ise'ebi baguè ba'iruna ti'añe gare porema'icua baè'è. Mèsacuabi Cristoni si'a recoyo ro'tajènna, baguè se'gabi mèsacuare tèani babi baguè. ⁹Mèsacua se'gabi baruna ti'añe ro'tajèn, Re'oye yo'oni ti'anza cajèn ba'icuata'an, ti'añe gare porema'iniè. Yè'è se'gabi re'ogué sèani, Riusu bainguè ruèn'è yè'è catoca, Riusubi yèma'iji. Ja'nca sèani, Riusu se'gabi maini oire bani, maire tèani baji. ¹⁰Riusubi maire re'huani jo'ca bi'raguè, re'oye yo'oye se'gare ro'taja'bè caguè, maire Cristo Jesusna te'e zi'in güeseye ro'tani, maire tèani re'huani jo'cabi baguè.

La paz que tenemos por medio de Cristo

¹¹Ja'nca sèani, mèsacua ja'anrè yo'ojèn ba'ise'ere ro'tani, mèsacua Cristo naconi yure mame re'huase'ere bojojèn ba'ijè'èn. Mèsacua yua judío bain jubè ba'ima'icua ba'ijènna, judío bainbi mèsacuani èñani, mèsacuare cajèn, Gu'ana'è. Si'si yo'o bain'è. Go neño ga'ni tøyoma'isi'cua'è, mèsacuare cajèn baè'è. Ja'nca ba'icuabi Riusu re'o bain, go neño tøyosi'cua cajèn ba'icuata'an, mèsacua ba'ise'ere'ru què'rè re'o bain beohuè, ro èn yija bain ro'tajèn yo'osi'cua sèani. ¹²Mèsacuare ja'nca gu'aye cajèn ba'icuata'an, mèsacua yua Cristoni gare huesècua ba'ijèn ba'nhuè. Ja'nca ba'ijèn, judío bain jubè naconi te'e ba'iye poremajèn ba'nhuè. Judío bainbi Riusu ira coca toyani jo'case'e, baguè yo'oja'yete ro'tajènna, mèsacuabi bacua naconi te'e ro'taye yèjèn ba'icuata'an, Riusu bain mame re'huasi'cua ba'iye poremai'huè. Riusu coñete cato, mèsacuare gare beoguè ba'nji. ¹³Ja'nca ba'ise'eta'an, yureca Riusu te'e jubè bainreba re'huasi'cua ba'iyè mèsacua. Cristo Jesusni huesècua ba'isi'cuareta'an, yureca Cristobi mèsacua gu'a jucha ro'ire junni tonguèna, baguè naconi Riusu te'e bain re'huasi'cua ba'iyè. ¹⁴Ja'nca junni tonni, mai si'acuare te'e zi'in güeseni, maini sa'ñeña bojo güeseni, maini baji. Yèquèna hua'na judío bainbi yua mèsacua judío bain jubè ba'ima'icua naconi sa'ñeña ai je'o bajèn ba'isi'cua ba'ijènna, yureca

maire sa'ñeña bojocuare re'huabi. ¹⁵Cristo yua crusu sa'cahuëna junni tonguëna, judío bain ira coca guanseni jo'case'ere ro guaja yo'oye gare se'e ro'tamajën ba'iyë. Ja'nca ba'ijënna, Riusubi ba samu bain jubëan sa'ñeña je'o basi'cuare ënaguë, ba samu jubëan ba'icua yequëcuare choini, baguë te'e jubë bainrebare re'huani, sa'ñeña bojojën ba'i güesebi Riusu. ¹⁶Gare se'e je'o bama'ija'bë caguë, baguë Zin Jesucristote ën yijana raoni crusu sa'cahuëna junni ton güesebi Riusu. Ja'nca junni tonguëna, mai si'acuabi te'e jubëna zi'inni, sa'ñeña recoyo te'e bojojën ba'iyë poreyë. Riusu bainreba te'e ba'iyë poreyë mai.

¹⁷Cristobi ën yijana rani, si'a jubëan bainni baguë bojo güese cocare quëani achoguë, mësacua judío bain jubë ba'ima'icua, Riusuni huesëcuani, yëquëna're'ga Riusuni masicuan, si'acuani te'e cocare quëani achoguë raji'i. Riusu coca zoe cani jo'case'eru yo'oguë raji'i. ¹⁸Ja'nca raisi'quëbi quëani achoguë, Si'a bain jubëan ba'icua, judío bain, judío bain jubë ba'ima'icua, si'acuabi Riusu Raosi'quëreba ba'iguëni si'a recoyo ro'tatoca, Riusubi baguë Espíritute maina raoguëna, mai si'acuabi Taita Riusuna te'e ti'añe poreyë. ¹⁹Ja'nca quëani achosi'quë sëani, yua tin bain gu'aye yo'ocua mësacuare gare se'e caye beoye ba'iji. Riusubi mësacuare choini, baguë te'e jubë bainreba ba'icuare re'huani baji. Ja'nca re'huani baguë, baguë naconi te'e zi'in güeseni, baguë re'o bain jubëre mësacuare re'huani baji. ²⁰Riusure ta'yejeiye yo'o concua, baguë cocareba quëani achocua, ja'ancuabi cajën ye'yojënna, güina'ru ba'iji mësacuare. Jesucristoni si'a recoyo ro'tareba ro'tajën, baguë naconi te'e zi'inni ba'ijën, Riusu bain jubëre carajeiye beoye re'huasi'cua ba'iyë. ²¹Ja'nca re'huasi'cua ba'ijën, Cristona recoyo te'e zi'inni ba'ijën, baguë yo'o se'gare re'oye yo'o conjën, ën yija gu'a ëase'ere gare se'e ro'taye beoye ba'ijënna, Cristobi baguë re'o bainrebare mësacuare quë'rë re'oye re'huani baji. ²²Re'huani baguëna, mësacuabi baguë yo'o cuencues'e se'gare yo'ojën, Riusu Espíritubi mësacua naconi te'e ba'iguëna, mësacua yua Riusu naconi quë'rë te'e ruiñe'ru recoyo zi'inni ba'ija'cua'ë.

Pablo encargado de llevar el evangelio a los no judíos

3 ¹Yureca yë'ë yua Cristo Jesusni yo'o conguë ba'iguëbi baguë cocarebare mësacua judío bain jubë ba'ima'icuan quëani achoguëna, yequëcuabi yë'ëre preso zeanni, yë'ëni bayë ënjo'on. Ja'nca preso zeansi'quëbi mësacua ba'iyete Riusuni senguë ba'iyë yë'ë. ²Riusubi mësacuani ta'yejeiye re'oye coñe ro'taguëna, mësacua yua achahuë. Mësacua yua judío bain jubë ba'ima'icua'reta'an, Riusubi yë'ëre cuencueni, mësacuani ta'yejeiye yo'o coñe guanseni saobi. ³Ja'nca guanseni saoguëna, yë'l'ë'ga mësacuana coca toyani saoguë, baguë guansese'ere quëahuë. Baguë se'gabi mësacuani ta'yejeiye conza

caguëna, mësacuana sani, baguë coñete mësacuana yo'oye ro'tayë yë'ë. ⁴Ja'nca yo'oye ro'taguëna, mësacuabi yë'ë uti toyase'ere coní, ëñani, ja'nre'bi, Riusu ta'yejeiye coñe, Cristo raose'ere caguë, ja'anre te'e ruíne masija'cua'ë. ⁵Baguëre ta'yejeiye coñete cato, ja'anrë ba'isi'cuani gare quëani achoma'iguë baji'i. Baguë se'gabi yahue masini, yurera baguëre ta'yejeiye yo'o concua, baguë cocarebare quëani achocua, ja'ancuani yurera masi güesebi Riusu. Baguë Espíritute raoni, baguë cuencuesi'cua se'gani masi güesebi. ⁶Ja'nca masi güesequëna, yurera baguë ta'yejeiye yo'o coñete masiyë mai. Judío bain se'ga baguë bainreba cuencuesi'cua ba'ijëna, yurera si'a bain, judío bain jubë ba'ima'icua're'ga cuencueni baza caguë yo'o bi'raji Riusu. Si'a bain baguë Zin Jesucristoni si'a recoyo ro'tacua, ja'ancuabi baguë te'e jubë bainreba re'huasi'cua ba'ija'cua'ë. Ja'nca re'huasi'cua ba'ijën, si'a Riusu bayete judío bain naconi te'e coní baja'cua'ë. Bacua naconi te'e bojojën, Jesucristoni te'e zi'inni ba'ija'cua'ë. Riusu yua ja'anrë caní jo'casi'quëbi yurera ja'nca yo'o'ji.

⁷Ja'an cocarebare mësacuani quëani achoguë ba'iyë yë'ë. Riusubi yë'ëre cuencueni, baguë ta'yejeiye coñete yë'ëni masi güesequë, yë'ëre ai re'oye yo'obi. Ja'nca yo'oguë, baguë ta'yejeiyereba yo'oye poreguëbi baguëre ta'yejeiye yo'o conguëre yë'ëre re'huani, mësacuana yë'ëre saobi. ⁸Riusu bain jubë ba'icua'ru quë'rë yo'jereba ba'iguëreta'an, Riusubi yë'ëre cuencueni, mësacua judío bain jubë ba'ima'icua'na yë'ëre saobi. Ja'nca saoguëna, baguë cocarebare mësacuana quëani achoguë ba'iyë yë'ë. Cristoni si'a recoyo ro'tajën ba'itoca, baguë ta'yejeiye bayete ai ëama'iñereba carajeiye beoye mësacuana ro insini jo'caguë ba'ija'guë'bi. ⁹Yeque cocare'ga si'a bainni masi güeseyë yë'ëre guansebi Riusu. Si'aye re'huani jo'casi'quëbi yë'ëre guansequëna, baguë yurera yo'o'ja'yete si'a bainni masi güeseyë yë'ë. Baguë yua ai ba'irën yo'oye ro'taguë, yurerën tëca bainni masi güeseyë beoguëbi yurera baguë cuencueni ro'tase'ere yo'o bi'raji Riusu. ¹⁰⁻¹¹Ja'anre si'a ën yija bain, si'a guënamë re'oto quë'rë ta'yejeiye ëjacua're'ga, si'acuani masi güesejë'ën cabi. Yë'ë bainreba jubëni ëñani, yë'ë masireba masini yo'ose'ere ye'yëjë'ën caji. Si'a bain, judío bain jubë ba'icua, judío bain jubë ba'ima'icua, si'acuabi Cristo Jesusni si'a recoyo ro'tani baguë yëye se'ga yo'ojën ba'icua, ja'ancua're yë'ë bainreba jubëre re'huani bayë yë'ë, caji. Ja'nca re'huani baguëna, mësacua ëñani, yë'ë masireba masiye re'huani jo'case'ere ye'yëjë'ën. Ja'anre si'arën yo'oye ro'tahuë yë'ë, caji. ¹²Ja'nca caguë, baguë bainre maire re'huaguëna, yureca baguëni gare huaji yëye beoye ba'iyë poreyë mai, baguëni si'a recoyo ro'tajën ba'icua sëani. Mai yëye ba'irën baguëna ti'anni coca senni achajëna, bëinma'iji. Maire gare etoni saoye beoye ba'iji Riusu. ¹³Ja'nca sëani, yë'ëbi mësacuani oire bani conza caguë, ai yo'oguëna, ja'nji recoyo bacua're re'huaye beoye ba'ijë'lën. Quë'rë jëja

recoyo re'huani ba'ijj'ën. Yë'ëbi ai yo'oguë ba'iguëta'an, mësacua yua quë'rë ta'yejeiye ba'icua ba'ija'cua'ë.

El amor de Cristo

14 Ja'nca sëani, mai Taita Riusuni si'a recoyobi senreba senguë ba'iyë yë'ë. 15 Si'a ën yija bain, si'a guënamë re'oto ba'icua're'ga, si'acua baguë bainrebare re'huani basi'cua, ja'ancua're senreba senguë ba'iyë yë'ë. 16 Si'ayete baguë're sëani, baguëni senreba senguë, baguë Espíritu bacua're mësacua're re'huajë'ën, cayë yë'ë. Ja'nca re'huani, mësacua huaji yëye beoye ba'icua're re'huaji. Jëja recoyoreba bacua're re'huaji mësacua're. 17 Mësacuabi Cristoni si'a recoyo ro'tani ba'ijjën, Cristo yua mësacua naconi te'e ba'iguë, yua baguë ba'iyete quë'rë ai ba'iyë mësacua ni masi güeseji. Baguë yua mësacua ni ai yëreba yëguëna, mësacua yua baguë ba'iyete quë'rë te'e ruiñe masini, baguëni quë'rë se'le recoyo zi'inni ba'iyë. 18 Ja'anre Riusuni senreba senguë, mësacua Cristoni zi'inni ba'iyë, ja'anre mësacua ni quë'rë ai ba'iyë masi güesej'ën se'ñ. Si'a Riusu bainreba jubë naconi Cristoni te'e zi'inni ba'iyë cato, ai ta'yejeiyereba ai re'oye ba'iji maire. Ai ëama'ñereba ro'tajjën ba'icua'reta'an, Riusubi ja'an re'oye ba'iyete mësacua ni masi güeseje poreji. Ja'an yo'oyete Riusuni senguë ba'iyë yë'ë. 19 Riusubi mësacua ni ai ba'iyë ai carajeiye beoye ai yëreba yëguë, ja'an ai yëyete mësacua ni masi güesej'ën se'ñ yë'ë. Baguë ta'yejeiyereba ba'iyete mësacua ni te'e ruiñe masi güesej'ën se'ñ yë'ë.

20-21 Mai Taita Riusu yua ai ta'yejeiyereba pore E'jaguëte sëani, baguëni ai bojoreba bojojën cañuni. Baguë yo'oye poreyete cato, re'oye masiye caraji maire. Baguë cuencueni ro'tase'ere yo'oto, baguë bainreba jubë Jesucristo naconi te'e ba'ijjënna, baguë yëye'ru ai ta'yejeiyereba mai jubë si'acua ni yo'o güeseje poreji Riusu. Ja'nca yo'o güeseje poreguëna, baguëni gare jo'caye beoye ai ba'iyë ai ta'yejeiye bojojën cañuni. Amén.

Unidos por el Espíritu

4 1 Riusubi mësacua ni ja'nca ta'yejeiye yo'o güeseje yëguë sëani, yë'ë yua preso zeansi'quëta'an, Riusu yo'o coñe ba'iguëbi mësacua ni si'a jëja yihuoguë ba'iyë. Mësacua yua Riusu te'e bainreba re'huasi'cua sëani, baguë yëye se'gare te'e ruiñe yo'ojjën ba'ijj'ën. 2 Yequëcua naconi ba'ijjën, bacua ba'iyë'ru quë'rë yo'je hua'na'ru ëñojën, bacua ni re'oye yo'ojjën ba'ijj'ën. Bacua ni huacha yo'otoca, bacua ni bëinmajjën, bacua yëyete ro'tajjën, bacua ni oire bajjën conj'j'ën. 3 Riusu bainreba jubë ba'icua, si'acua ni conj'jën, bojo güeseje ro'tajjën ba'ijj'ën. Mësacua si'acua yua Riusu Espírituna te'e zi'inni ba'icua sëani, Riusubi ja'nca yëji. 4 Riusu bainreba ba'ijj'ënna, Riusu Espíritubi mai si'acua ni gaje meni baji. Mai si'acua Jesucristo choisi'cua

ba'ijën, baguëni recoyo te'e zi'inni ba'icuabi baguë naconi carajeiye beoye ba'ija'cua ba'ijën, te'e ëñajën ëjojën ba'iyë mai. ⁵Mai si'acuabi mai Ëjaguëreba se'gani recoyo te'e ro'tajëna, baguë Espiritubi maina gaje meni baguë, mai recoyore tënoto, gare te'e tënosi'cua ba'iyë mai. ⁶Ja'nca te'e tënosi'cua ba'ijëna, mai Taita Riusubi baguë mamacuare maire te'e re'huani baji. Ja'nca baguëbi mai ta'yejeiyereba Ëjaguë ba'iji. Si'aruan ba'iguëbi mai si'acua naconi gare jo'caye beoye te'e ba'iji.

⁷Mai naconi ja'nca te'e ba'iguëbi baguë bainreba jubë ba'icua, ga bainguëni tin yo'o coñe, maini ta'yejeiye yo'o güeseji. Cristobi yo'o güeseguëna, ga bainguëbi tin yo'ore yo'oye poreguëna, si'a jubëbi sa'ñeña te'e conjën ta'yejeiye yo'ojën ba'iyë. ⁸Riusu coca toyani jo'case'ere ëñato, ñaca caji:

Baguë yua guënamë re'otona mëiguë saiguë, ai ta'yejeiye yo'oguë, baguëre je'o bacuani ñu'ñojeija'guëbi.

Ja'nca yo'oguëbi baguë bainni ta'yejeiye yo'o yo'oye porecuare re'huaguëna, ga bainguëbi tin yo'o yo'oye poreja'guë'bi, toyani jo'case'e ba'iji.

⁹Yureca mëiguë saija'guë'bi caguëna, mësacua yua ja'an cocare ro'tani ye'yejë'n. Ru'ru, ën yijareba tëca gajeye babi baguë. ¹⁰Ja'nca gajeni ba'ini, ja'nrebi se'e guënamë re'otona mëji'i. Ja'nca mëisi'quëbi yua guënamë re'oto si'a re'otoreba quë'rë ta'yejeiye Ëjaguë re'huasi'quë baji'i. Ja'nca ba'iguëbi, baguë cani jo'case'e'ru yo'oguë, si'a baguë bainre ta'yejeiye yo'o yo'oye porecuare re'huabi. ¹¹Ja'nca re'huaguëna, yequëcuabi baguëre ta'yejeiye yo'o conjën, baguë bainreba jubë si'a jubëte ëñajën cuirajën ba'iyë. Yequëcuabi baguë cocarebare bainni masi güesejën ba'iyë. Yequëcuabi si'a huë'e joboñana ganijën baguë cocarebare quëani achajën ba'iyë. Yequëcuabi te'e huë'e jobo bain jubëte ëñajën, Riusu cocarebare ye'yojën ba'iyë. ¹²Ja'nca ta'yejeiye yo'o güesebi Cristo. Yë'ë bainreba ba'icuabi yë'ë ba'iyete re'oye ye'yejë'n, sa'ñeña re'oye conni cuiraye masijën, si'a jubëbi quë'rë jëja recoyo re'huani jaijeija'bë caguë, baguë bainni ta'yejeiye yo'o güesebi. ¹³Ja'nca sa'ñeña conni cuirajën, si'a jubëbi Riusu Zin Cristoni si'a recoyoreba te'e ruiñe ro'tajën ba'ija'cua'ë. Cristobi ru'ru maini re'oye yo'o conguëna, mai si'a jubëbi güina'ru yo'ojën, baguë yo'ore ta'yejeiyereba yo'o conjën ba'ija'cua'ë. ¹⁴Ja'nca ba'ijën, baguë ba'iyete ye'yema'isi'cua'ru gare se'e ba'ima'inë cajën ba'iyë. Baguë ba'iyete huesëjën ba'itoca, yequëcuabi tin yihuojëna, ro huesë ëaye recoyo te'e ruiñe ro'taye porema'inë. Yogu tayoye huesëjën ba'itoca, sao ziyabi bacuare ro memoji. Ja'nca huesëcua'ru huesëjën, si'a bain ro re'o coca cacuani achajën, ro coque güesejën ba'iyë. Ja'nca ba'ijëna, ba coquecuabi bacua bayete ro tëani bayë. Ja'nca coque güesejën ba'itoca, Riusubi yëma'iji. ¹⁵Mai yo'o yo'oye cato, ñaca yëji Cristo. Baguë cocareba

cani jo'case'ere te'e ruiñe cajën, sa'ñeña oijën conjën, baguë masiye'ru re'oye masijën, baguë ba'iy'e'ru güina'ru ba'ijj'ën, caji Cristo. Baguëbi caguëna, te'e ruiñe achani, Jaë'ë cajën, güina'ru yo'ojën ba'ijj'ën. Baguë yua mai ta'yejeiyereba Ëjaguëre säani, baguë ba'iy'e'ru te'e ba'ijj'ën. 16 Ja'nca ba'itoca, baguë bainreba jubë si'a jubëbi baguë naconi quë'rë se'le te'e zi'inni ba'ijjën, quë'rë jëja recoyo bacua re'huaajën ba'ija'cua'ë. Baguë yëye'ru te'e yo'ojën, baguë ta'yejeiye yo'o conjën, sa'ñeña oire bajën cuirajën, recoyo quë'rë re'oye te'e zi'inni ba'ija'cua'ë mai.

La nueva vida en Cristo

17 Yureca, mai Ëjaguë yihuoye'ru, mësacuani si'a jëjareba yihuoguë ba'iyë yë'ë. Gu'a bain, Riusure huesëcua, ja'ancia yo'ojën ba'iy'e'ru gare se'le yo'oye beoye ba'ijj'ën. Bacua yo'o yo'oye ro'tayete cato, ro ro'tajën, ro yo'ojën ba'iyë. 18 Riusu yëyete gare ro'taye beoye ba'ijjën, baguëre yo'o coñe gare yo'omajën ba'iyë. Ja'nca säani, baguë ba'iyete huesëjën, baguëni te'e zi'iñe beoye ba'ijjën, zijei re'oto se'gare ro rënni ganojën ba'iyë. 19 Re'oye yo'oyete cato, bacua yua yo'oye gare huesëcua'ru ruincua se'ga ba'ijjën, si'a bacua gu'a äase'e se'gare yo'oñu cajën, gare jo'caye beoye gu'ajeijën ba'iyë bacua. 20 Mësacuaca Cristo ba'iyete ja'nca ye'yemaë'ë. 21 Mësacua yua Cristo cocarebare te'e ruiñe achajën, baguë ba'iyete te'e ruiñe ye'yejën ba'itoca, gu'a bain yo'oye'ru gare yo'oye beoye ba'iyë mësacua. 22 Ja'nca säani, mësacua ja'anrë yo'ojën ba'ise'ere gare jo'cani senjojë'ën. Ja'nca yo'ojën ba'isi'cuabi Riusu bënni senjoja'cua se'ga ba'ijjën ba'nhuë. Mësacua yua ro ro'tajën, gu'aye yo'oye se'gare yo'ojën ba'nhuë. 23 Ja'nca yo'ojën ba'isi'cuabi yureca mame recoyo re'hua güesejë'ën. Mame re'hua güeseni, ja'nrëbi mësacua ba'iyë si'aye Riusu ba'iy'e'ru te'ereba ba'iyë. 24 Ja'nca ba'icuabi Riusu cuencueni re'huani jo'case'ere ye'yejën, baguë ru'rureba yëse'ere ye'yejën, baguë yëye'ru re'oye yo'ojën, baguë bainreba yo'oye cuencuese'ere te'e ruiñe yo'oye se'ga ro'tajën ba'ijj'ën.

25 Ja'nca ba'icua säani, gare se'le coquemajën ba'ijjën, si'a bainni te'e ruiñe se'ga cajën ba'ijj'ën. Mai jubë si'acua yua Cristoni recoyo te'e zi'inni ba'icua säani, ja'nca yo'ojën ba'ijj'ën.

26 Yequëni bëintoca, baguëni gu'aye yo'oye beoye gare ba'ijj'ën. Baguëni bëiñe ja'ansi umuguse jo'cani se'le ro'tama'ijj'ën. 27 Ja'nca yo'oma'itoca, zupai huatibi mësacuani zeanni toñe poreji. Ja'nca säani, baguë coqueyete jëani, mësacua bëinjën ba'iyete jo'cani se'le rotama'ijj'ën. 28 Bonsere jianjën ba'isi'cua banica, gare se'le jiañe beoye ba'ijj'ën. Re'o yo'o yua si'a jëja te'e ruiñe yo'ojën, mësacua curi te'e ruiñe cojën ba'ijj'ën. Coni, ja'nrëbi bonse caracuana ro insiye poreja'cua'ë.

29 Gu'a coca caye beoye ba'ijj'ën. Yequëcuani cocare cato, re'o coca se'gare cajën ba'ijj'ën. Bacuani bojo güeseza cajën, bacuani re'oreba

coca se'gare cajën ba'ijë'ën. Ja'nca cajën ba'itoca, Riusubi bacuani quë'rë re'ojei güeseni, bacuani quë'rë re'oye coñe poreji. ³⁰Ja'nca sëani, gu'a cocare caye beoye ba'ijën, Riusu Espírituni sa'nti güeseye beoye ba'ijë'ën. Mësacua yua Riusu Espírituni te'e zi'inni ba'icuabi Riusu bain tëani baja'yete te'e ruiñe masijën ba'iyë. Ja'nca sëani, Espírituni sa'nti güeseye beoye ba'ijë'ën.

³¹Gare gu'aye yo'oye senjoni ba'ijë'ën. Yequëcuani gu'aye yo'omajën ba'ijë'ën. Yequëcuani sa'nti güeseye beoye ba'ijë'ën. Yequëcuani bëiñe beoye ba'ijë'ën. Yequëcuani gu'aye caye beoye ba'ijë'ën. Yequëcuani je'o cocare caye beoye ba'ijën, bacua gu'aye yo'ose'ere je'o caye beoye ba'ijë'ën. ³²Ja'nca caye beoye ba'icuabi re'o coca se'gare cajën ba'ijë'ën. Yequëcuani oire bajën bojo güeseye cajë'ën. Bacua gu'aye yo'ose'ere gare se'e ro'tama'iguë'ë yë'ë, bacuani cajë'ën. Mësacua gu'aye yo'ojën ba'ise'ere cato, Cristobi ja'an ro'ire junni tonguëna, Riusubi gare se'e ro'tama'iguë ba'iji.

Cómo deben vivir los hijos de Dios

5 ¹Mësacua yua Riusu mamacua ai yësi'cua sëani, Riusu ba'ie'ru ba'ie ro'tajën ba'ijë'ën. ²Ja'nca ba'ijën, yequëcuani jo'caye beoye oire bajën conjën, bacuani ai yëjën ba'ijë'ën. Cristobi maini oire baguë conse'e'ru yequëcuani güina'ru yo'ojën ba'ijë'ën. Baguë yëyete yo'ozca cama'iguëta'an, mai ro'ire crusu sa'cahuëna junni senjosi'quë baji'i. Ja'nca ba'iguëna, Riusubi ëñani, Cristo ai yëguë yo'ose'ere re'oye ro'tani, baguë ai bojobi.

³Mësacua yua Riusu bainreba re'huasi'cua sëani, ëmëcua romicua sa'ñeña yahue bani a'ta yo'oye, ja'anre yëni yo'oye, si'a gu'a ëase'ere cato, gare ro'taye beoye ba'ijë'ën. Riusu bainreba ba'icuabi ja'anre sa'ñeña coca caye beoye gare ba'ijë'ën, gu'ana sëani. ⁴Güina'ru sa'ñeña gu'a coca caye beoye ba'ijën, ro caye beoye ba'ijën, ro huere cocabi yequëcuani sa'nti güeseye beoye ba'ijë'ën. Yequëcua ba'iyete coca cato, re'o coca se'gare cajën, bacuare Riusuni surupa cajën ba'ijë'ën. ⁵Ën coca yua te'e ruiñe ba'i cocare sëani, gare huanë yeye beoye ba'ijë'ën. Ëmëcua romicua sa'ñeña yahue bani a'ta yo'ojën ba'icua, ja'an yo'oye ro'tacua, bacua ro gu'a ëase'e se'gare ro'tajën ba'icua, ja'an si'acuabi Riusu ba'i jobona gare ti'añe beoye ba'ija'cua'ë. Bonse ba ëaye ba'icua'ga gare ti'añe beoye ba'ija'cua'ë. Ja'ancua yua Riusuni gu'a güecua ba'iyë. Ja'nca ba'icuabi Riusu bainreba jubë, Cristo naconi te'e ba'icua, gare carajeiye beoye ba'icua, ja'ancuana gare në'caye porema'iñë. ⁶Ja'nca sëani, mësacua yua ëñare bajën, bain coquecuani achamajën ba'ijë'ën. Re'oye achoye cacuata'an, ro coqueye se'gare yo'ojën ba'iyë. Ja'nca gu'aye yo'ojën, Riusuni ro achajën, zupai huatire concua se'ga ba'iyë. Ja'nca ba'ijë'ënna, Riusubi bacua si'acuani ai

bënni senjoja'guë'bi. 7 Ja'nca bënni senjoja'guë ba'iguëna, mësacua ëñare bajën, bacuana gare zi'iñe beoye ba'ijë'ën.

8 Mësacua ja'anrë yo'ojën ba'ise'ere cato, bacua yo'ojën ba'ie'ru güina'ru yo'ojën ba'nhuë. Ro zije re'otore rënni ganojën ba'nhuë. Riusure gare huesëcua ba'ijën ba'nhuë. Ja'nca ba'isi'cuabi yureta'an Cristoni si'a recoyo ro'tajën ba'icuabi Riusuni masini si'ani, mia re'oto se'gare ganijën ba'iyë mësacua. Ja'nca ba'icuabi yequëcuani ja'an mia re'oto ganiñete masi güeseza cajën, Riusu yo'oguë ba'ie'ru re'oye yo'ojën ba'ijë'ën. 9 Ja'nca yo'ojën ba'ijën, Riusu bainreba ba'iyete masi güesejënna, si'acuabi ëñani, mësacua te'e ruiñe yo'ojën ba'ie, mësacua re'oye yo'ojën ba'ie, Riusu yëye'ru yo'ojën ba'ie, ja'anre ëñani masiyë. 10 Ja'nca sëani, mësacua yo'ojën ba'iyete cato, mai Ëjaguë yëyete ro'tajën, jo'caye beoye te'e ruiñe yo'ojën ba'ijënna, baguë yua mësacuan i ëñani bojoi. 11 Gu'a bain zije re'otona ro rënni ganoñete cato, bacua ro yo'ojën ba'ie'ru gare yo'oye beoye ba'ijë'ën. Ja'nca ba'icuabi bacua ro gu'aye yo'ojën ba'iyete bacuani masi güesejën ba'ijë'ën. 12 Bacua gu'aye yo'ojën, bacua yahue yo'ojën ba'iyete ro'tato, sa'ñeña can i achoye beoye ba'ijë'ën, gu'ana sëani. 13 Yureca, mai hua'na Riusu bainreba ba'icuabi baguë yëyete yo'ojën, Riusu ba'iyete yequëcuani ai miañe ëñojën, bacua zije re'oto rënni ganojën gu'aye yo'oyete bacuani masi güesejë mai. 14 Mësacua yua ën coca can i jo'case'ere ro'tajën, ja'anre te'e ruiñe masijë'ën:

Cainsi hua'guë sëta raiye'ru, ju'insi hua'guë go'ya raiye'ru, ja'an'ru ba'iguëbi zije re'otobi sani, mia re'otona eta rajjë'ën.

Ja'nca raiguëna, Cristobi mia re'otore më'ëni te'e ruiñe gani güeseji. Baguë ba'iyete më'ëni te'e ruiñe masi güeseji.

Ja'nca can i jo'case'e ba'iguëna, mësacua yua Riusu ba'iyete yequëcuani ai miañe ëñojën, bacuani masi güesejën ba'ijë'ën.

15 Ja'nca sëani, mësacua ëñare bajën, Riusuni masicua yo'ojën ba'ie'ru caraye beoye yo'ojën ba'ijë'ën. Riusuni huesëcua yo'ojën ba'ie'ru gare yo'oye beoye ba'ijë'ën. 16 Ën yija bainbi jo'caye beoye gu'aye yo'ojën ba'icua sëani, mësacua porese'e'ru si'arën re'oye yo'ojën ba'ijë'ën.

17 Ja'nca sëani, mësacua yua ro ro'tani yo'oye beoye ba'ijë'ën. Riusu yëyete jo'caye beoye masiye ro'tajën, baguë yo'o se'gare yo'ojën ba'ijë'ën.

18 Mësacua yua jo'chana gare güebeye beoye ba'ijë'ën. Ja'nca güebetoca, si'arën gu'aye se'gare yo'o bi'rayë. Riusu Espíritu gaje meni bañu cajën, ja'an se'gare ro'tajën ba'ijën, baguë bojo güeseje'ru bojojën ba'ijë'ën.

19 Ja'nca bojojën, yequëcuani bojo güesejën ba'ijë'ën. Mai Ëjaguë ba'iyete bacuani bojoye yihuojën, si'a ganta cocabi baguë ta'yejeiye ba'iyete bojoreba bojojën can i achojën, bojo reconoia sa'ñeña te'ereba re'huan i ba'ijë'ën. 20 Ja'nca bojojën ba'ijën, mësacua yua si'aye mai Taita Riusu ro insini jo'case'ere ro'tajën, gare jo'caye beoye baguëni surupa cajën

ba'ijjè'ën. Mai Èjaguè Jesucristo maire oireba oiguè conguè ba'ise'ere ro'tajèn, ja'nca bojojèn, Riusuni surupa cajèn ba'ijjè'ën.

La vida familiar del cristiano

²¹Yureca mèsacua yua Cristo ta'yejeiyereba ba'iyete ro'tajèn, baguèni caraye beoye achani baguè yo'ore yo'ojèn, güina'ru sa'ñeña ba'iyete ro'tajèn, mèsacua bain'ru què'rè yo'je ba'icua'ru bacuani ènojèn, bacuani re'oye èñajèn ba'ijjè'ën. ²²Romicua, mèsacua yua Cristo ta'yejeiyereba ba'iyete èñajèn, baguè cayete achani Jaè'è cajèn, güina'ru mèsacua ènjè ta'yejeiye ba'iyete èñajèn, baguè cayete achajèn Jaè'è cajèn, baguèni yo'o conjèn ba'ijjè'ën. ²³Mèsacua ènjè yua mèsacua èjaguèrè sèani, baguèni ja'nca yo'o conjèn ba'ijjè'ën. Cristo ba'iyete cato, baguè yua güina'ru si'a baguè bainreba jubè Èjaguèbi ba'iji, bacuani tèani baguè sèani. ²⁴Riusu bainreba jubè si'acuabi Cristo ta'yejeiyereba ba'iyete èñajèn, baguè cayete achajèn, te'e ruiñe yo'ojèna, güina'ru mèsacua romicua yua mèsacua ènjè ta'yejeiye ba'iyete èñajèn, baguè cayete achajèn, te'e ruiñe yo'ojèn ba'ijjè'ën.

²⁵Èmècua, mèsacua yua mèsacua rënjoni ai oire bajèn conjèn, bagoni ai yèreba yèjèn ba'ijjè'ën. Cristobi baguè bainreba jubète ai oire baguè, Bacuare tèani baza caguè, bacua ro'ire junni toñe tèca bacuani ai yèreba yèguè bajì'i. Ja'nca ai yèreba yèguèna, mèsacua rënjore'ga güina'ru ai yèreba yèjèn ba'ijjè'ën. ²⁶Cristobi baguè bainrebare èñaguè, Gare gu'a jucha beocuare bacuare re'huani baza caguè, baguè cocarebare maini masi güeseguè, mai recoñoare tènoreba tènoguè bajì'i. ²⁷Ja'nca maire tènoguè, Yè'è bainreba jubè yua ai re'oye ba'icuare re'huani, gare si'si recoñoa beocuare bacuare ta'yejeiyereba re'huani baza caguè, maini ai oireba oiguè, maini ai yèreba yèguè, mai ro'ire junni tonbi baguè. ²⁸Cristobi ja'nca maini ai yèreba yèguèna, mèsacua èmècua'ga güina'ru mèsacua rënjoni ai yèreba yèjèn ba'ijjè'ën. Mèsacua carajèn ba'iyete ro'tani, mèsacua ja'ansi'cua ja'an ba'iyete baye ro'tajèn, mèsacua rënjo carago ba'iyete güina'ru ro'tani, bagoni cuirajèn ba'ijjè'ën. Bago yua mèsacua naconi te'e zi'inni ba'igore sèani, bago carago ba'iyete re'oye ro'tani, bagoni cuirajèn ba'ijjè'ën. ²⁹Bago yua mèsacua naconi te'e zi'inni ba'igona, bago aon, bago caña, si'aye bagoni cuirajèn ba'ijjè'ën. Mèsacua ja'ansi'cua aon, caña, ja'anre carato, mèsacuabi cu'eye güema'icua'è. Güina'ru mèsacua rënjo carago ba'iyete te'e ruiñe cu'ejèn ba'ijjè'ën. Cristobi baguè bainreba carajèn ba'iyete te'e ruiñe cuiraye'ru, mèsacua güina'ru yo'ojèn ba'ijjè'ën. ³⁰Si'a jubè yua Cristoni te'ereba zi'inni ba'icua sèani, maini ai re'oye cuirani conjì. ³¹⁻³²Ja'an te'e zi'inni ba'iyete cato, mèsacua yua ja'anre re'oye ye'yeye ti'anma'itoca, Riusubi si'a bainni ja'anre masi güesema'iji. Baguè coca cani jo'case'ere achani ro'tajè'ën:

“Yureca, ëmëcuabi bacua pël'caguëte pël'cagote gare jo'cani, bacua rënjoni te'e zi'inni ba'ijë'ën. Ja'nca ba'ijë'ëna, ba samucuabi te'e bainguë ba'iyë'ru ba'iyë.” Ja'an coca cani jo'case'ere ro'tani, Cristo re'huase'ere ye'yejë'ën. Cristobi baguë bainreba jubëte maire re'huani, maini te'e zi'inni, baguëre yo'o concuare maire re'huani baji. ³³Mësacuanì ja'nca canì achoguë, ñaca'ga mësacuanì yihuoguë cayë yë'ë. Mësacua ëmëcua yua ja'ansi'cua ba'iyete ro'tani cuiraye'ru mësacua rënjoni giïna'ru ro'tani, bagoni ai ba'iyë ai yëreba yëjën ba'ijë'ën. Mësacua romicua yua mësacua ënjë ta'yejeiye ba'iyete ëñajën, baguë cayete achajën, Ja'ë'ë cajën, yo'ojën ba'ijë'ën.

6 ¹Mësacua zin hua'na yua Cristo ta'yejeiye ba'iyete ëñajën, baguë cayete achajën, te'e ruiñe yo'ojën, giïna'ru mësacua pël'caguë sanhuë cayete achajën, te'e ruiñe yo'ojën ba'ijë'ën. Riusubi ja'an yo'oyete mësacuanì guanseni jo'cabi. ²⁻³Ën cocare ro'tani masijë'ën: “Mësacua pël'caguëni pël'cagoni te'e ruiñe ëñajën ba'ijë'ën. Ja'nca ëñajën ba'itoca, mësacua ën yija ba'i umuguseña yua ai zoe ba'ijën, ai bojojën ba'iyë” guanseni jo'cabi Riusu. Ja'nca canì jo'caguë, ai ta'yejeiye ba'i coca sëani, baguë bainni guanseni, baguë bojo güeseja'yere'ga quëabi. Ja'nca sëani, ja'an coca guanseni jo'case'ere ro'tajën, mësacua pël'caguë sanhuëni re'oye achajën ba'ijë'ën.

⁴Mësacua ëmëcua yua mësacua zin hua'nani hui'ya yo'omajën, bacuanì bëin güeseye beoye ba'ijë'ën. Mai Ëjaguë yëye se'gare yo'ojën, bacuanì ai oire bajën ye'yoni yihuojën, bacuanì bojora'rë si'nsejën irojën ba'ijë'ën.

⁵Yureca, mësacua ëja bainni yo'o conjën, bacuabi yo'o cajë'ëna, mësacua ëñare bajën, bacua cayete achajën, te'e ruiñereba re'oye yo'ojën ba'ijë'ën. Cristo cayete achani yo'oye'ru giïna'ru mësacua ëja bain cayete te'e ruiñe achani, re'oye yo'ojën ba'ijë'ën.

⁶Mësacua ëjaguëbi ëñaguëna, ja'anrën se'gabi baguë yo'ore re'oye yo'otoca, mësacua yua gu'aye yo'oyë, bainguë ëñani bojoye se'gare ro'tacua sëani. Mësacua ëjaguë yo'ore conjën, gare jo'caye beoye si'a recoyobi re'oye yo'o yo'ojën ba'ijë'ën. Cristo yo'o coñe'ru giïna'ru bain ëjaguë yo'o conjën ba'ijë'ën. Ja'nca yo'ojën ba'itoca, Riusubi mësacuanì ëñani bojoi. ⁷Mësacua ëjaguëni re'oye yo'o conjën, Cristoni bojojën ba'ijë'ën. Bain ëñani bojoyete gare ro'taye beoye ba'ijën, Cristo ëñani bojoye se'gare ro'tajën ba'ijë'ën. ⁸Mai Ëjaguë Riusubi si'a bainni ëñani, bacua ta'yejeiye ba'iyete ro'tama'iguë, bacua re'oye yo'o yo'ose'ere masini, ga bainguëni re'oye ro'ija'guë'bi, bacua re'oye yo'ose'e'ru ba'iyë.

⁹Mësacua yua ëja bain ba'ijën, yo'o concuare bajën, bacuanì re'oye yo'ojën ba'ijë'ën. Yua mai ta'yejeiye Ëjaguë Cristo guënamë re'otore ba'iguë, baguë yua mësacua ba'iyete ëñaguë, mësacua yo'o concua'ru quë'rë ta'yejeiye beoyë mësacua caji. Ja'nca sëani, mësacua yo'o concuare

guanseto, bacuani gu'aye caye beoye bajën, bacuani je'lo coca caye beoye ba'ijj'ën.

Las armas espirituales del cristiano

¹⁰⁻¹¹ Yureca, mäsacuani ñaca yihuoni tējyë yë'ë. Riusubi zupai huatini guerra huaguëna, mäsacua yua Riusure yo'lo concua cuencuesi'cua ba'iyë. Ja'nca sëani, jëja recoyo re'huaye re'oye ye'yej'ë'n. Riusubi ta'yejeiye yo'oye porecuare mäsacuare re'huaye poreguëna, Riusu yo'oye pore güeseyete si'a jëja ro'tajën ba'ijj'ën. Zupai huatibi ai masiye coqueguëna, mäsacua yua Riusu ta'yejeiye poreyete ro'tajën ba'ijj'ën. Ja'nca ro'tama'itoca, zupaini ta'yejeiye ënseye gare porema'inë mäsacua. ¹² Ñaca'ga ro'tani masijj'ën. Gu'a bain hua'na ga'nihuëan bacuani huama'inë mai. Zupai huati, baguëre yo'lo concua si'acua, ja'ancuani, guerra huajën ba'iyë mai. Bacua yua si'aruanre ganijën, maini coque ëaye yo'ojën ba'iyë. Ën yijare ba'ijjën, ma'tëmë re'otore ba'ijjën, bain recoñoare'ga ba'ijjën, gu'aye guanseyën ba'iyë si'a huati jubëan. ¹³ Zupaire concua yua ai jai jubë ba'ijjënna, zupaibi bacuani ta'yejeiye guansegüë ba'iji. Ja'nca ba'iguëbi Riusu bainni huani tējiza caguë, baguë yua Riusu, Riusu bainreba ba'icua, si'a jubëni ai ta'yejeiye je'lo bani huaja'guë'bi. Ja'nca huaguëna, Riusubi mäsacuani ta'yejeiye yo'lo güeseguëna, mäsacua yua jëja recoñoa re'huaye te'e ruiñe ye'yej'ë'n. Ja'nca ye'yetoca, zupai huatibi mäsacuani tëani senjoñe porema'iji. Mäsacua yua Riusu yo'oye porecuaru re'huasi'cuabi si'a jëja huajën, zupai concuaru quë'rë ta'yejeiye ba'ija'cua'ë. ¹⁴ Ja'nca jëja bajën, zupai jubëni guerra hua bi'rajën, Riusu cocareba case'e'ru te'e ruiñe yo'ojën ba'ijj'ën. Ja'nca yo'ojën ba'itoca, mäsacua yua si'a jëja yo'oye porejën, zupai jubëni huaji yëye beoye ba'iyë. Riusu yëye'ru te'e ruiñe yo'ojën ba'ijjënna, zupaibi mäsacuare gu'a coca caye gare porema'iji. ¹⁵ Riusu cocarebare si'a bainna jo'caye beoye quëani ahojën ba'ijj'ën. Ja'nca yo'ojën ba'itoca, ai jai jubë bainbi Riusuni huaye jo'cajën, Riusuni te'e zil'inni ba'iyë. ¹⁶ Ja'nca re'oye yo'ojën, Cristoni si'a recoyo ro'taye gare jo'caye beoye ba'ijj'ën. Zupai huesoni senjoñete jëaye ba'icua sëani, baguë toa ya'rrire mäsacuana cha'coni saoye gare porema'iji. Mäsacuare ai gu'a coca caguëta'an, mäsacuani huesoni senjoñe gare porema'iji. ¹⁷ Mäsacua yua Riusu bain tëani bacua sëani, Riusu tëani base'ere huanë yeye beoye ba'ijj'ën. Ja'nca ba'itoca, zupai huatibi mäsacuani tëani baye gare porema'iji. Riusu cocarebare'ga quë'rë ai ba'iyë ye'yejën, Riusu Espiritubi conguëna, quë'rë se'e ba cocarebare quëani ahojën ba'ijj'ën. Ja'nca ba'itoca, zupaibi mäsacuani tëani baza caguëta'an, gare jëja baguë yo'oye porema'iji. ¹⁸ Mäsacuabi ja'nca jëja bajën, Riusu Espiritubi mäsacuani sen güesey'e'ru Riusuni si'a jëja jo'caye beoye senjën ujjajën ba'ijj'ën. Riusu bain jubë

si'a jubëbi sa'ñeña ujañen, Riusuni senreba senjën, zupai jubëni huajën ba'iyë. Ja'nca ba'icua sëani, mësacua yua gare jo'caye beoye Riusuni senjën ba'ijë'ën. ¹⁹Yë'ëre'ga si'a jëja senreba senjën ba'ijë'ën. Yequëcuani Riusu cocarebare quëani achoye poreto, huaji yëye beoye quëani achoguë, Riusu cocare masiye caye te'e ruiñe poreye yëyë yë'ë. Ja'anre ro'tajën, Espiritu coñete senjën, Riusuni yë'ë ba'iyete ujañen ba'ijë'ën. ²⁰Yë'ë yua ya'o huë'ena preso zeansi'quë ba'iguëta'an, Riusure yo'o conguëbi ba'iyë yë'ë. Ja'nca ba'iguëbi si'a ën yija bain ta'yejeiye ëjacuani Riusu cocarebare quëani achoye bayë yë'ë. Ja'nca sëani, Riusu cuencuese'e'ru ba'iyë, baguë cocare si'a jëja te'e ruiñe cani achoye yëyë yë'ë.

Saludos finales

²¹Yureca, yë'ë ba'iyete, yë'ë yo'o yo'oyete, ja'anre mësacuaní quëaye yëguëbi mai te'e bainguë ai yësi'quë Tíquico hue'eguëte mësacuana saoyë. Cristo yo'ore te'e ruiñe conguë'bi ba'iji baguë. Ja'nca ba'iguëbi yë'ë ba'iyë si'ayete mësacuaní quëaja'guë'bi. ²²Ja'nca quëaguëna, mësacua yua baguë cocare achani, yëquëna ba'iyete te'e ruiñe masini, jëja recoyo re'huaye poreja'cua'ë mësacua.

²³Yureca, mai Taita Riusu, mai Ëjaguë Jesucristo, bacua recoyo re'lo huano güeseyete señë yë'ë. Mësacuaní ja'nca re'lo huano güesejën, mësacuaní ai ba'iyë ai carajeiye beoye re'oye yo'ojën ba'ija'bë. Mësacua yua Riusu bain ai yësi'cuabi baguëni si'a recoyo ro'tajën, baguëni ai yëreba yëjën ba'ijë'ën. ²⁴Mai Ëjaguë Jesucristoni jo'caye beoye ai yëreba yëjën ba'icua, si'acuabi Riusu bayete carajeiye beoye ro coní bajën ba'ijë'ën. Ja'nca raë'ë. Amén.